

25. In sacrificio, apud equorum lustrationem instituto, ignis rite accensus flamma sua dextrorsum flexa, quasi manu porrecta obtulit ei victoriam.

26. Urbe atque locis contiguis munitis, omnibus rebus a tergo bene instructis, bona fortuna sequente, RAGHUS cum exercitu senario, plagas vincere cupiens, profectus est.

27. Consperserunt eum civium matronæ farre, veluti oceani lactei undæ BRAHMANEM guttis, *Mandaræ* montis ope suscitatis.

28. Ille, INDRÆ similis, primo orientem versus processit, hostibus minans quasi vexillis vento agitatis.

29. Pulvere curribus excitato, elephantisque nubibus similibus, terræ solo cælum æquavit, cœloque terræ solum.

30. Splendor in fronte incessit, tum clangor, deinde pulvis, denique currus et reliqua : ex his, quasi quatuor agminibus, exercitus ejus compositus erat.

31. Per potentiam suam deserta sicca aqua redundare fecit, fluvios altos faciles transgressu, saltusque illustres reddidit.

32. Magnum exercitum versus mare orientale ducens, apparebat ille veluti BHAGÍRATHAS, ducens *Gangam*, de SIVÆ vertice delapsam.

33. Via ejus conspicua erat regibus, fructus suos relinquere coactis, evulsis, atque sæpe fractis, ut arboribus elephanti via.

34. Ita omnes regiones orientales superans, victor ille pervenit ad magni oceani litus, palmarum sylvis nigrum.

35. *Suhmi* ab eo, velut a fluminis rapiditate, inflexibiles evellente, vitam servarunt, calamos imitantes.

36. *Bangis*, qui navibus suis confidebant, violenter devictis, dux ille tropæa constituit in *Gangæ* insulis.

37. Illi, ad pedum plantas usque inflexi, oryzæ instar evulsi atque restituti, fructibus eum donarunt.

38. *Kapisa* trajecta a militibus, per elephantos, pontis instar colligatos, *Utkalensibus* viam monstrantibus, *Kalingam* versus profectus est.